

Legher ma vair

In comic davart l'istorgia da la chasa federala

■ (LR/kk) Sin l'emprim d'avrigl è cumpari il comic «Il misteri alv» da Matthias Gnehm e Francis Rivolta che preschenta a moda autentica la chasa federala. Quest crimi è vegnì edì a chaschun dal 100avel anniversari da la chasa federala e dat invista en las localitads da la chasa federala. En vista al 100avel onn d'existenza dal parlament a Berna han ils servetschs dal parlament edì il comic «Il misteri alv» en rumantsch grischun da *Matthias Gnehm* e *Francis Rivolta*. I sa tractra qua d'in crimi che gioga en las salas dal cussegl naziunal e dal cussegl dals chantuns, en il corridor e la cupla.

In di è svanì in pitschen fresco. Tge è capità? Signur Jacques e dunna Anna ch'èn sa spezialisads sin enguladitschs d'art mainan las inquisiziuns. Els sfuglian l'entira chasa federala dal tschaler fin si tar la cupla senza chattar indizis. Ma i vegn anc mender: Durant l'observaziun svanescha ina notg perfin anc il grond maletg en la sala dal cussegl naziunal. Il suspect croda l'emprim sin Félix V. che tutga tar l'equipa da nettegiament e che ha colur vi da sia vestgadira... Ma alura chattan ils detectivs en il tschaler ina maschina che tegna frestga dapi l'onn 1902 la colur dals frescos. Uss na funcziuna ella però betg pli. Èn perquai svanids ils maletgs? E co vegnan els puspè a la glisch?



Il frontispizi dal cudesch
«Il misteri alv».

MAD

Quest misteri pudais Vus scuvrir cun cumprar e leger il comic. El è cumparì en in'ediziun communabla da la Lia rumantscha (LR) e l'Uniun Rumantsch Grischun (URG) e po vegnir retratg per il pretsch da fr. 28.00 tar tut las librerias che vendan cudeschs rumantschs.

Titel: Il misteri alv
Auturs: Matthias Gnehm e Francis Rivolta
Paginas: 48 paginas, cun illustraziuns en colurs e plans da la chasa federala
Format: 24 x 31 cm, lià
ISBN: 3-03900-009-8
Pretsch: fr. 28.00